

Aria anyu ma angu e`dapi ri ni arioti ofezuri- The honey guides revenge

Page1.

Karile azini anyamgbolo ru ni ndra ci ru ni oguzu i. Eri ndra `ba azi afa ale pi `ba yi pie ku, lepi za ini gbi ri ma ta mba pi dria ima ngulupi dri, kaka zopi l vile amvu werearu ri ma alia ri ozipi ozi ni.

O`du alu, Oguzu ni ovu ria doria asea `dale, eri aria tratra ru ri ma o`duko. Oguzu ma tusu e`do ra egata anyu kalikali ri ma dria risi. So pa ra eri o`duko niri kilili, e`do eri nda kpere esu aria gakanyaa ru ri pati sia ima dria oru. "Ciricirciri-circircirciri-circirciri" aria gakanyaru ri ri wu kile tibiriti ma efi `bani aya alaza ru ri ni owuzu alenia `dale rile. Traatara ka mu ne ima agyi azini asi `bapi anyu oso dria ra ni ci `dini `bo, e`do coti aci pati arakala ma eselesi jorovu vu `dale. Ciricirciri circircirciri circirciri mu drile, so pa pale karakarau nezu kilili kini oguzu obi ima vuti ra.

Peji 2

Saa azini miniti kali na ru `dile ni ma vutia, ca ki elio pati azi ni amboru ni vu. Traa tra a e`do di ombu badaka ru pati ma sia si. Mu di ari ku arakala azi aluni ma sia ra ela di ima dri Oguzu ni nezu kile te `ye `yozu eri ni"eri `do `l! mi emu di! A`di ni mi saa eza ni yaa?" Afa azi Oguzu ni eco ne pari erini ovuzu ria ra ni yo, te ni aria anyu ma angu e`dapi ri ma okpo anyu jorovu oso be tretre ri esuzuri ra.

Page 3

Oguzu ku l vile nyafe dori ni `diyi ku pati etia `da. Tra di eja nyiri aci were ni eduzu. Aci ka mu di kilili `bo, oguzu su kali azini azini ezu ni aci `da ma agadria `da. Eja `di ma azi ndra tutuni acika ofuzu eri ni veria. Ka mu ne kilili kini eri di ve `dini `bo, e`do di tu pati sia `dale, pati nde ma etile aci kokoru ri be ima tilia.

Page 4

Mbleru e`do anyu azi ngapi tu `diyini no ria ruu. "ah," ega ima asia, "ma eco bekunisi anyu ma aji arikari ru ri ama oli alia ra. Ale anyu ma aji `dini!" ka mu ca gule vu `bo, su kali ma si aci be ri gule alia `dale mbeleru. Anyu efu dria enzu ruu amve`dole omba pie.

Page 5

Yi ma pari ka mu efu amve `bo, Oguzu sui ma dri gule ma alia `dale, enze anyu ma zunguruku dria tre tre, anyu oso be circiri. Ga anyu l odupi were were `dayi ma azo ekaka ko si. Osu anyu ma zunguruku `dayi e`yere jurua ini sui ma ombelea azini agatia `diyi ma alia. Gule ka di mu ace pirini `bo, Oguzu esi di e`yere pati ma etia ele `dole.

Page 6

Traa traa ne e`yo yi `yepi `diyi dria asi `baza be. Rua ni ri ya kpakpa, saa Oguzu ni cazu pati etia ele `dale anyu ma zunguruku kuzu pati etia `daa alu awa`difo ru ri tee. Traattraa le oku anyu ma o`bu osoru `diyi zunguruku niri be tu. E`do ombu arakala aluri ma sia risi azini ria `dini `dini kpere nyaku vu ele `doa. Asizu, Oguzu ca di nyaku dria vaa `dale ra. Traattraa saa ri oni azini ngala`baa ni ma dria nyakua `dale esele ivilealeru ri tezu.

Page 7

Te Oguzu anyu aci ra, e`du I vile nyafe yi dri kozu mvizu akua, gbu aria gakanyaru ri ku kala si. Traattraa wu o`duko eri vile oku `bani ni lera ri si. Saa Oguzu ma drilia azini ri oni azi eri ma drilia ni ma dria. `Daa ne di agupi `da milia miliadika tre di vini o`duko oru si kini, `BA AGAPI nirrr! BA AGAPI nirrr!. Oguzu so pa, ne aria gaa ru ri ni rag u o`duko si. Ille drini ayipi vaa ri `I `dini ice, ma agyi? Ha ha! A`di nga te azi niri dria ni azini anyu odu te a`di `i ? Ama anyu oso aluza `di awa mi be a`di e`yo si, afa efile koko `di? Ida mi ra imu afa azi ni nda nya ondre ta ru `i." Ka mu dri ji oli alia si eri dro zu `bo, Oguzu ko di dri mu I vile akua.

Awoko nya traa traa ni tu! Agu `di eco e`yo oku `I `ye pi a`bia drio `dile ri idera azini ga awa`difo feko si ngoni ngoni! Te traa traa ma okpo ndra yo `dini ku. Eri nga mu e`yo ini le ri `ye ra!

Page 8

Traa traa te azini mba agu `da mba karakara arioti I vile ri ofezu.

O`du alu sabiti tre ma vutia, Oguzu eri vini omveta traattraa ni `ba omvezu anyu vu ri. Ka mu anyu ndra ini nzu asi zu ri ma aji alu za ri ma dria e`yo ega `bo, Oguzu e`do aria gakanyaa ru ri ma vuti bi dika. Erini amgu jere ma kona ru rig a zu `bo ri ma vutia, traa traa ku di geri oku ini `ba omve zu "cricicirciri-cricicirciri-cricicirciri" ri ra emu di ri ava li pati azini daru oci be ni ma etia. "ahaa" Oguzu ega. 'Le turu ma ovu di pati `di ma sia' mbeleru edu aci ra e`do di tu pati `da ma sia, kali aci be ri pie ima tia. Traa traa ri lu eri ne ne.

Page 9

Oguzu ni turia, ri di osu `I eri andruni anyu ma nota oku rile ri ku a`disi ya ri. "Gule niri kani di pati ma talaa alia `dale ya ani" ega ima asia. Erini di tuni ava `bazu turia azini orobi anyu aluza ri vile ri drozu eri obisi ria, fu dri milia milia o`du azini be. O`du e`yokokoru `da ri de ini ima ava etu si ri li pati erini lele tu ri ma sia, ande erini enga zu za ndazu ini ra `bo ri ma vutia, esu lulu gaza azini okporu ni enga `I o`dua risi `bo. Okorisi o`du aya gbadridri ra `dama vutia awoko nya eri `bani eri engazu o`dua risi tu.

Esi ima mile lurua, zi ima ti wala ima si `wara azini cipi aci aci `diyi e`dazu ra coti zo agu pi `da ma dria andreti ni `yazu onyofi si.

Page 10

Oguzu ari ru esizu pati `da ma sia risi vaa `dole kile eri `ye e`de e`de le ngoni le. E`de di ku kucu vaa `da ra onyo ima falako karakara. Eri ma drileba ri di lu o`du ni andezu kayi ra eri ni ecozu nzuzu vuti ni si ku ri `i. te `da ma talasi, Oguzu nzu ongu eri ma foloko onyopi ra `dayini eco nzu ri. E`dozu `dasi kpere andru nyi`biliko o`du ni ndra eri ma andreti ovi zu ri awi nga kiri eri ma andretia ci.

Traa traa nga di oku arioti I vile ri of era. Dika Oguzu asi di oku aria anyu ma angu e`dapi ri ma vuti obiza si o`du `dasi. Te anzi oguzu vile `diyi eri ma anzi ma anzipi yi be eri o`dko traa traa ma dria ri ra ani fe ndra eri ni inzita tu. Saa dria yini muzu anyu nzuzu ri ma alia, yi ne kilili kini yi ku anyu ma horongoto ambo ndeni azini oso be coro ri ku traa traa dri.